

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 176. sjednici, održanoj dana 13.10.2022. godine, d o n o s i

ZAKLJUČAK

I.

Prihvata se Mišljenje Ministarstva za rad, socijalnu politiku i izbjeglice o Nacrtu Zakona o zaštiti od nasilja u porodici, predlagača Vibora Handžića, delegata u Domu naroda Parlamenta Federacije Bosne i Hercegovine.

II.

Zaključak sa Mišljenjem iz tačke I. ovog zaključka upućuje se u dalju skupštinsku proceduru.

III.

Stupanjem na snagu ovog Zaključka, stavlja se van snage Zaključak Vlade Zeničko-dobojskog kantona, broj: 02-02-13912/22 od 15.09.2022. godine.

IV.

Zaključak stupa na snagu danom donošenja.

PREMIJER

Mirnes Bašić

Broj: 02-_____ /22

Datum, 13.10.2022. godine

Z e n i c a

DOSTAVLJENO:

1x Ministarstvo za rad, socijalnu politiku i izbjeglice,

1x Skupština Zeničko-dobojskog kantona,

1x a/a.



ZENIČKO-DOBOJSKI KANTON
VLADA

N/r Sekretara
N/r Premijera

Broj: 09-02-11780-5-1/22
Zenica, 05.10.2022. godine

PREDMET: Mišljenje na Nacrt Zakona o zaštiti od nasilja u porodici, daje se

Postupajući u skladu sa zaduženjem po aktu Stručne službe Skupštine broj: 01-2-02-11780-4/22 od 15.09.2022.godine, u vezi dostavljanja mišljenja na Nacrt Zakona o zaštiti od nasilja u porodici, predlagača Vitora Handžića, delegata u Domu naroda Parlamenta Federacije, a na osnovu dostavljenog Zaključka Doma naroda Parlamenta Federacije Bosne i Hercegovine, broj: 02-02-1525/22 od 28.07.2022.godine, nakon razmatranja dostavljenog Nacrt Zakona, Ministarstvo za rad, socijalnu politiku i izbjeglice daje sljedeće:

M i š l j e n j e

Ovo ministarstvo je razmotrilo predloženi tekst Nacrta Zakona o zaštiti od nasilja u porodici (u daljem tekstu: Nacrt Zakona) i mišljenja smo da predložena zakonska rješenja daju jasnije odredbe u postupanju subjekata zaštite žrtava nasilja u porodici.

Također, mišljenja smo da se u skladu sa reformskim procesima pojedine odredbe Nacrta Zakona trebaju doraditi ili precizirati, kako slijedi:

U članu 7. stav (2) tačka d) i e) Nacrta Zakona treba izbrisati riječ „prijetnja“, jer stav (3) ovog člana propisuje da se pod radnjom nasilja u porodici smatraju i prijetnje radnjama iz stava (2) ovog člana. Zatim, tačku koja glasi: „v) svaka druga radnja koja predstavlja nasilje u porodici“ treba bolje precizirati ili brisati jer može uticati na nejednakost u postupanju i primjeni ovog zakona.

U članu 11. stav 2. Nacrta Zakona potrebno je definisati radnje koje svaki od subjekata zaštite treba poduzeti u cilju prevencije i suzbijanja ili ponavljanja nasilja u skladu sa djelokrugom rada, odnosno nadležnostima subjekata zaštite.

Članom 12. Nacrta Zakona precizirati na način da je specijalizirana nevladina organizacija ona fondacija ili udruženje građana koji su registrirani u skladu sa Zakonom o udruženjima i fondacijama, te djeluju na suzbijanju i prevenciji nasilja, na način da podiže svijest građana i organizuje kampanje o nasilju u porodici i zajednici, provodi edukacije u oblasti nasilja, pruža usluge pravne i psihosocijalne pomoć žrtvama, podršku osnaživanju žrtava, usluge besplatne telefonske linije, pružaju usluge zbrinjavanja i podrške u sigurnoj kući (u daljem tekstu: sigurna kuća) i koji ispunjavaju standarde iz člana 53. Nacrta Zakona.

U članu 18. Nacrta Zakona pored hitnosti postupka i obaveze postupanja subjekata zaštite potrebno je propisati i obaveznu koordinaciju subjekata zaštite u prevenciji, pružanju podrške osnaživanja i zaštite žrtve nasilja.

Članom 55. Nacrta Zakona propisano je da sredstva za finansiranje sigurnih kuća osiguravaju se iz budžeta Federacije Bosne i Hercegovine u visini od 40%, iz budžeta kantona na području kojeg

se realizira sigurna kuća u visini od 40% i iz budžeta općine na čijem području žrtva ima prijavljeno prebivalište u visini od 20% od utvrđene cijene smještaja žrtve. Ovu odredbu je potrebno izmjeniti u smislu da dio u sufinansiranju troškova zbrinjavanja u sigurnu kuću u visini od 40% snosi kanton iz kojeg je smještena žrtva, a ne kanton na čijem području se realizuje sigurna kuća, odnosno smještaj. Sličan model finansiranja u procentima od 30% Kanton, 30% lokalne zajednice i 40% Federacija BiH je u periodu od 2010. do 2013. godine bio realizovan u Zeničko-dobojskom kantonu i nije bio efikasan, jer izuzev Zeničko-dobojskog kantona u potpunosti obaveze nije izvršavala većina lokalnih zajednica i Federacija BiH. Stoga je potrebno pripisat sankcije za one koji ne izvršavaju obaveze sufinansiranja ili eventualno urediti jednostavniji i praktičniji model finansiranja kako bi se osiguralo funkcionisanje sigurnih kuća i time bolja zaštita i podrška žrtava.

U članu 70. Nacrta Zakona propisano je da Vlada kantona donosi jednogodišnji program mjera za prevenciju, zaštitu i borbu protiv nasilja u porodici za područje kantona. S obzirom da je trenutna obaveza donošenja dvogodišnjeg programa mjera za prevenciju, zaštitu i borbu protiv nasilja u porodici i da se ista pokazala nedovoljno efikasnom zbog slabe koordinacije nadežnih subjekata zaštite i nepostojanja garancije da će se projektne aktivnosti realizovati na duži vremenski period, smatramo da je potrebno propisati donošenje srednjoročnog programa mjera za prevenciju, zaštitu i borbu protiv nasilja u porodici na period od 4 godine, koliko i traje mandat koordinacionim tijelima koja se formiraju u skladu sa članom 73. Nacrta Zakona. Pored obaveze koordinacionim tijelima da izrade navedeni program, u članu 73. Nacrta Zakona se također propisuje obaveza da koordinaciono tijelo godišnje izvještava izvršnu i zakonodavnu vlast čime je osigurano praćenje provedbe navedenog programa, dok je s druge strane propisana veća obaveza profesionalcima koji pored redovnih poslova izvršavaju i poslove koordinatora, i to vrlo često jedna osoba je član više radnih tijela. Stoga predlažemo da se formiraju tijela koja će raditi samo poslove koji se propisuju koordinacionom tijelu, kao što je to pitanje riješeno na federalnom nivou sa Gender centrom Federacije BiH.

U članu 70. Nacrta Zakona pored sudija i tužilaca potrebno je propisati stručno osposobljavanje i usavršavanje svih stručnih osoba koje učestvuju u procesu zaštite i podrške žrtvama.

U članu 77. Nacrta Zakona nisu propisane sankcije za lažne prijave nasilja ili manipulacije u procesu zaštite žrtava, s obzirom da se u praksi dešavaju i ovakve pojave koje opterećuju ljudske i druge resurse.

Imajući u vidu naprijed navedeno, ministarstvo podržava donošenje ovog zakona i smatra da se na ovaj način treba sistemski urediti proces zaštite i podrške žrtava nasilja u porodici i zajednici.

S poštovanjem,

Dostavljeno:

1x Naslov

1x a/a

MINISTRICA

Azra Sinanović



Bosna i Hercegovina, Zenica, Kučukovići br. 2
Telefon: 032/460-680; Fax: 032/460-682; e-mail: min.rad@zdk.ba